

## 01

### 《时人为上高里歌》

迁京之始。朝士住其中。迭相讥刺。竟皆去之。惟有造瓦者止其内。京师瓦器出焉。世人歌曰：

洛阳城北上高里。殷之顽民昔所止。  
今日百姓造瓮子。人皆弃去住者耻。

## 02

### 《高平牧马诗》

董绍

走马山之阿，马渴饮黄河。  
宁谓胡关下，复闻楚客歌。

## 03

### 《悲彭城》

祖莹

悲彭城。楚歌四面起。  
尸积石梁亭。血流睢水里。

## 04

### 《杨白花》

胡太后

阳春二三月。杨柳齐作花。  
春风一夜入闺闼。杨花飘荡落南家。  
含情出户脚无力。拾得杨花泪沾臆。  
秋去春还双燕子。愿衔杨花入窠里。

## 05

### 《捣衣诗》

温子升

长安城中秋夜长。佳人锦石捣流黄。  
香杵纹砧知近远。传声递响何凄凉。  
七夕长河烂。中秋明月光。  
螭蟠塞边绝候雁。鸳鸯楼上望天狼。

## 06

### 《挟瑟歌》

魏收

春风宛转入曲房，兼送小苑百花香。  
白马金鞍去未返，红妆玉箸下成行。

## 07

### 《对雨》

刘邕

重轮宵犯毕，行雨旦浮空。  
细落疑含雾，斜飞觉带风。  
湿槐仍足绿，沾桃更上红。  
无由似玄豹，纵意坐山中。

## 08

### 《冬日伤志篇》

邢邵

昔时情游士，任性少矜裁。  
朝驱玛瑙勒，夕衔熊耳杯。  
折花步淇水，抚瑟望丛台。  
繁华夙昔改，衰病一时来。  
重以三冬月，愁云聚复开。  
天高日色浅，林劲鸟声哀。  
终风激檐宇，馀雪满条枚。  
遨游昔宛洛，踟蹰今草莱。  
时事方去矣，抚己独伤怀。

## 09

### 《送庾羽骑抱》

郑公超

旧宅青山远，归路白云深。  
迟暮难为别，摇落更伤心。  
空城落日影，迴地浮云阴。  
送君自有泪，不假听猿吟。

## 10

### 《三日华林园公宴诗》

邢邵

回銮自乐野，弭盖属瑶池。

五丞接光景，七友树风仪。  
芳春时欲遽，览物惜将移。  
新萍已冒沼，馀花尚满枝。  
草滋径芜没，林长山蔽亏。  
芳筵罗玉俎，激水漾金卮。  
歌声断以续，舞袖合还离。

## 11

### 《感琵琶弦》

冯小怜

虽蒙今日宠，犹忆昔时怜。  
欲知心断绝，应看膝上弦。

#### Reference

《洛阳伽蓝记》《诗纪》《乐府诗集》《先秦汉魏晋南北朝诗》

---